

門之德入

DJIP TEK TJI BOEN

PEMIMPIN

KA DJALAN KABEDJIKAN.



Djilid ka 28. Kah Tjoe 2475. T.H.B.K. XIII.

WARTA DARI BESTUUR.

Dengan hormat,

Membri taoe bahoea lantaran pakerdja annja sendiri ada banjak, hingga keniatannja Siansing LIEM KWIE GIOK, jang tadinja aken oeroes penerbitannja ini tijdschrift, kepaksa dibatalken dan itoe oeroesan di serahken poela pada Siansing GO KHING LIANG, dengan terbantoe oleh Siansing TJOA JAN HIE boeat menjalin bahasa Melajoena.

Soepaia pembatja mendapet taoe.

八德之門 Hjiip Erh Eji Boru

Diterbitken boeat moeat salinan-salinan isinja kitab-kitab dari Nabi Agoeng KHONG HOE TJOE dan lain-lain kitab jang soetji. Dibagi-bagiken pada anggota-anggota dari KHONG KAUW HWEE, -SOERABAIA.

下論第十一

HEH LOEN TEE SIP IT.

Kitab Heh Loen hoofdstuk 11.

三子者出。曾晳後。曾晳曰。夫三子者之言何如。子曰。亦各言其志也已矣。

Sam tjoe tjia tjoet. Tjeng sek houw. Tjeng sek wat. Hoe sam tjoe tjia tji gan ho dji. Tjoe wat. Ek kok gan ki tje ja i ie.

Artinya:

Koetika itoe katiga moerid-moerid kaloeear, tjoema Tjeng Sek, atawa Tjeng Ti am, sengadja masih tinggal di blakang. Kamoedian ia laloe menanja pada Nabi kita, bagimanatah iapoenna pendapetan atas perkata'an-perkata'an marika bertiga.

Nabi kita mendjawab: Tida ada apa-apa, biar jang satoe membitjaraken prihal kekajahan dan kategoeannja negri, dan jang lain membitjaraken prihal adat-kasopanan, tapi semoea tida lebi dari pada menjataken masing-masing toedjoehannja sendiri.

曰·夫子何哂由也。

Wat. Hoe tjoe ho sim joe ja.

A r t i n j a :

Tjeng Tiam merasa tida maoe mengarti sama djawaban dari goeroenja ini, maka ia laloe menanja lebi djaoe:

Djika demikian adanja, mengapatah djoega goeroekoe esamin pada Tiong Joe (Tjoe Louw) ?

曰·爲國以禮·其言不讓·是故哂之。

Wat. Wi kok i le. Ki gan poet djiaang. Sie kouw sim tji.

A r t i n j a :

Nabi kita mendjawab:

Dalem hal mengatoer negri, kendatipoen ada penting sama katjoekoepannja kepandean, tapi djoega koedoe lebi doeloe octamaken prihal adat-kasopanan dan kesabaran, dengen apa soepaia 上下和睦 — Siaang Heh Ho Bok — antara pembesar dan pembawahnja bisa djadi akoer dan achirnja negri bisa djadi aman. Tapi, dalem mengoetarakken pikirannja Tjoe Louw tida begitoe adanja, hanja malah ia menjataken sikapnya jang membangga dan keras, dimana tida ada terdapat pernjata'an ia-poena pikiran jang bersabar, hingga ternjata jang ia tida dapet taoe kapentingannja prihal mengatoer negri jang teroetama. Begitoelah maka akoe djadi tersenjoem.

唯求則非邦也與·安見方六七十·

如五六十·而非邦也者·

Wi kioe tjeuk hoei pang ja i. An kiaan hong liok tjhit sip.

Dji ngoh liok sip. Dji hoei pang ja tjiia.

A r t i n j a :

Moerid Tjeng Tiam masih salah mendoega, bahoea Nabi kita djadi tersenjoem dari lantaran Tjoe Louw poenja

kebangga'an sama prihal mengatoer negri, sedeng sabenarnja ia djadi mesam kerna Tjoe Louw poenja pembitjara'an ada berhalocan keras dan tida mempoenjai itoe kesabaran. Demikian, lantaran masih bersangsi maka Tjeng Tiam laloe menanja poela sembari katanja:

Kaloe begitoe, djadi moerid Djiam Kioe goeroekoe anggep ia tida membitjaraken tentang oeroesan negri, hanja ia tjoema mengoetarakken pikirannja prihal aken berdaja soepaia rajat dari sasocatoe negri bisa dapet katjoekoepan, maka djoega djadi goeroekoe tida tertawaken padanja ?

Nabi kita mendjawab poela :

Kau kliroe, moeridkoe. Masatah jang ia baroesan bitjaraken prihal negri ketjil jang loewasnja anem-toedjoe poeloe atau lima-anem poeloe Li, boekan ada soeatoe negri djogca ?

唯赤則非邦也與·宗廟會同非諸侯而何·赤也爲之小·孰能爲之大·

Wi tjeuk tjeuk hoei pang ja i. Tjeng biauw hwee tong hoei tjeo hoh dji ho. Tjehet ja wi tji siaoh. Siok leng wi tji taij

A r t i n j a :

Kombali Tjeng Tiam masih tetep mengira, bahoea Nabi kita tertawain Tjoe Louw ada lantaran ia itoe membitjaraken prihal oeroesan negri, maka ia telah menanja lebi djaoe:

Dan, apakah Kong Sek Tjehet brangkali boekan bitjaraken prihal mengatoer negri, maka goeroekoe djadi tida esamin ?

Nabi kita menjaoet:

Beekankah ia bitjaraken prihal gredja dimana radja-radja bikin sembahangan aken menghormati laloehoernja, dan bitjaraken djoega prihal perhimpoenan dimana dibikin pertemuan dengan radja-radja ? Maka, apakah itoe semoea boekan membitjaraken adanja itoe radja-radja moeda jang ada mempoenjai tana-draera ?

Sedeng Kong Se Tjheck, jang ada poenja kepandean, ia bisa merendaken diri dengan mengakoe bahoea ia tjoema berharep aken bisa djadi sebagai pembantoe sadja, kaloe itoe moerid poenja ingetan jang demikian dibilang ketjil, siapatah jang bisa melebihin besar dari ianja?

Kat rangan:

Diliat, jang Nabi kita taro rasa moefakat sama pembitjara'nnja moerid-moerid Djiam Kioe dan Kong Se Tjheck kendati marika ini poen ada membitjaraken prihal oeroesan negri, ternjata bahoea, djika ia telah djadi tersenjoem tatkala mendenger perkata'nnja moerid Tiong Joe, boekanlah lantaran ia ini poenja pembitjara'an jang membitjaraken oeroesan negri, hanja ia mesam berbochoeng sama Tjoe Louw poenja pembitjara'an jang menjataken bahoea ia tida ada poenja kesabaran.

下論第十二

Heh Loen Tee Sip Djie.

Artin ja:

Kitab Heh Loen hoofdstuk 12.

顏淵問仁。子曰。克己復禮爲仁。
一日克己復禮。天下歸仁焉。
爲仁由已。而由仁乎哉。

Gan jan boen djin. Tjoe wat. Khek ki hok le wi djin.

It djit khek ki hok le. Thian heh koei djin jan.

Wi djin joe ki. Djie joe djin houw tjaij.

Artin ja:

Moerid Gan Jan telah menanja pada goeroenja prihal tjarianja orang melakoeken kebatiaan 仁—Djin.

Nabi kita kasi katrangan. Batir Djin adalah 心之全德. 愛之理也—Sim tji tjoantek. Aij tji li ja—poko dari segala kabedjikan dan sedjatinja pengrasahan tjinta-kaseh. Kaloe Djin dibitang ada poko dari segala kabedjikan, sebab 純乎天理者也—Soen houw thian li tja ja—berdasar atas wet atawa keadilan Toehan. Tapi orang haroes mengetahoei djoega bahoea antara manoesia kebanjakan kena ditindis oleh kenafsoean hatinja, hingga itoe batin Djin jang soetji djadi kena teroesak. Apabila manoesia dalem satoe hari sadja bisa perangin naftsoenja sendiri hingga menang, ia-poenja batin nistjaia bisa djadi soetji dan bresi kombali ka tempat kasooctjan serta mengandoeng wet Toehan. Djika soeda bisa terjadi sademikian, kita poenja kelakoean dan batin keadilan nanti aken terakoch oleh seloeroc alam, kerna —心之全德. 天下之公理也—Itsim tji tjoantek. Thian heh tji kong li ja—keadillannya batin jang kabedjikkannja octoeh adi mendjadi poko dari doenia poenja kabenaran oemoem. Aken melakoeken kebatinan Djin ada bergantoeng pada diri kita sendiri, boekanlah moesti mengandel bantoeannja lain orang, maka boeat lakocken kebatinan terseboet sasoenggoenja boekanlah ada soeatoe hal jang soeker.

顏淵曰。請問其目。子曰。非禮勿視。

非禮勿聽。非禮勿言。非禮勿動。

顏淵曰。回雖不敏。請事斯語矣。

Gan jan wat. Tjheng boen ki bok. Tjoe wat. Hoei le boet sie. Hoei le boet theeng. Hoei le boet gan. Hoei le boet tong.

Gan jan wat. Hwe soei poet bin. Tjheng soc soe gi ie.

Artin ja:

Gan Jan, sebagai moerid jang berotak tadjem, mendenger perkata'an goeroenja itoe soeda mengarti baik maksoed-maksoednja, maka ia tjoema menanja lagi fatsal-fatsalnja jang

orang haroes perangin nafsoenja, soepaia hatinja bisa djadi soetji aken melakocken wet Toehan. Nabi kita kasi katrangan:

Djangan memandeng soeatoe apa jang djadi melanggar pada adat-kasopanan, djangan mendenger soeatoe apa jang djadi melanggar pada adat-kasopanan, djangan mengomongin soeatoe apa jang djadi melanggar pada adat-kasopanan dan djangan bergerak boeat socatoe apa jang djadi melanggar pada adat-kasopanan, kerna kita poenja keampat anggota itoe, jaitoe: mata, koeping, moeloet dan kaki-tangan, ada pengharoe besar bagi penarikan hati nafsoe manoesia, maka koedoe di djaga dengan berati, ati soepaia djangan kaseret oleh itoe pemandengan, pendengeran, penggerakan atawa pembitjara'an, dimana semoea ada menjelak bahaja.

Sasoedanja dapet ini katrangan, itoe moerid laloe berkata:

H w c e kendati bodo, ia hendak tjoba perhatiken goeroekoe poenja nasehat-nasehat itoe.

Katrangan lebi tegas, dari boekoe 摂言—Tjhwat Gan:

Maka Nabi kita menerangkan keada'annja itoe keampat anggota manoesia jang sanget penting, kerna begini:

1). 心之神當聚於目—Sim tji sin siang tjie i b o k = katadjemanna batin biasa ada mengoempol di mata, maka fatsal pengliatan koedoe didjaga dengan ati-ati. Kaloe orang tida djaga ati-ati, dengen gampang matanja nanti kena tarik oleh sifat warna jang koerang baik hingga lantas menjeret batinnja aken djadi tida benar. Dengan begitoe, maka ada itoe seboetan djadi mata mamerenta pada batinnja;

2). 心之用每通於耳—Sim tji jong bwethong i d ji = kagoena'annja batin saben djoega ada berhoeboeng sama koeping, maka fatsal pendengeran tida boleh tida di djaga baik. Kaloe orang tida djaga ati-ati, dengen moedah nanti

koepingnya bisa ketarik oleh soeara-soeara jang koerang bagoes hingga lantas menjeret djoega batinnja aken djadi tida djedjak. Dengan demikian, maka ada itoe seboetan djadi koeping mamerenta pada batinnja.

3). 心之所發, 言則傳之—Sim tji se hwatt: Gan tje k thoan tji = terlahirnya apa jang terkandoeng oleh batin adalah perkata'an djadi pelataran aken menjampeken, maka omongan djoega haroes didjaga ati-ati. Kaloe orang batinnja koerang tegoch, pembitjara'anja poen bakal djadi sembarang, sebab apa jang hendak dioetjapken tida dipikir doeloe dengan baik. Begitoelah, maka djadi moeloet mamerenta pada batinnja, dan

4). 心之所欲, 動莫禦之—Sim tji se jok: Tong bok gi tji = apa jang dimaoeken oleh batin tida bisa tida temjata dalem gerakan di lahir, maka fatsal gerak-gerakan poen koedoe didjaga baik-baik. Kaloe orang batinnja koerang tegoch gerak-gerakannya nanti banjak jang tida beratoeran, kerna apa jang aken diperboeat zonter ditjari taoe lebi doeloe apakah baik atawa tida. Inilah djadi berarti, gerak-gerakannya mamerenta pada batinnja.

Nabi kita kasi djawaban begitoe roepa pada pertanja'annja moerid Gan Jan kerna ia taoe bahoea ini moerid memang soeda ada poenja pengertian prihal mendjaga batinnja, maka ia djadi maoe tambaken sadja peringatan soepaia ia bisa djaga batinnja djangan kena ditindis oleh pengaroehnja itoe keampat anggota, jaitoe mata, idoeng, moeloet, dan kaki-tangan, hanja malah sebaliknya batinlah jang haroes mamegang kendali aken mamerenta pada anggota terseboet. Dengan begitoe djadilah lahir batin ada lengkap, jaitoe: 由乎中而應乎外, 制乎外所以養其中也—Joe houw tieng dji ceng houw gwee. Tjie houw gwee se i jang ki tieng ja = apa jang terkandoeng di batin bisa ditjotjoki oleh jang di lahir, dan sebaliknya, dengen taro wates-watesan pada lahirnya aken membikin soepaia batinnja bisa tinggal anteng.

仲弓問仁。子曰。出門如見大賓。
使民如承大祭。己所不欲勿施於人。
在邦無怨。在家無怨。仲弓曰。
雍雖不敏。請事斯語矣。

Tiong kiong boen djin. Tjoe wat. Tjhoet boen dji kiaan tajj pin.
Soe bin dji sin tajj tjee. Ki se poet jok boei si i djin.
Tajj pang boe waan. Tajj keh boe waan. Tiong kiong wat.
Jong soei poet bin. Tjheng soe soe gi ie.

Artin ja:

Lain moerid lagi bernama Tiong Kiong menanja pada goeroenja, jaitoe Nabi Khongtjoe, prihal tjaranja orang melakoeken Djin bagimana adanja. Nabi kita mendjawab begini:

Prihal melakoeken Djin tida lebi dari-pada haroes mendjaga batinnja dan boeit bisa mendjaga batin orang koedoe senantiasa berlakoe prihatin dan memake rasa-merasa. Soewal prihatin, adalah bisa dioendjoek peroepama'an sebagai adanja saorang jang hendak kaloear pintoe, jang mana ia lakoken itoe sebagai lagi maoe ketemoein satoe tetamoe agoeng, dimana ia djadi djaga dirinja soepaia berada didalem peradatan dan kealoesin; sedeng prihal rasa-merasa, adalah oepama saorang jang melakoeken paprentahan pada rajat, boeat mana ia pandang itoe sebagai lagi mengadepi soeatoe sembahangan besar, dimana ia pake pengrasahannja aken menghormat pada roh aloes jang disoedjoetin. Dalem membawa dirinja koedoe beringet, bahoca apa jang ia tida socka lain orang berboeat padanja, sebaliknya djanganlah ia berboeat itoe terhadep pada orang lain. Demikianlah, maka biar didalem roema sendiri, maoepoen pada orang-orang dari dalem sanegri, kita senantiasa tida dapat sesalan.

Maka Nabi kita nasehatken demikian; sebab moerid Tiong Kiong poenja prilakoe batinnja koerang prihatin.

Tiong Kiong kamodian berkata:

Jong kendati bodo, bialal ia nanti tjoba perhatiken goeroekoe poenja nasehat-nasehat itoe.

司馬牛問仁。子曰。仁者其言也訥。

Soe ma gioe boen djin. Tjoe wat. Djin tja ki gan ja djiem.

Artin ja:

Moerid Soe Ma Gioe djoega perna menanja pada goeroenja prihal keada'nnja orang jang melakoeken Djin dan Nabi kita kasi djawaban begini:

Saorang jang berlakoe Djin, apabila hendak kelocarken perkata'an tida sembarangan ia oetjapken, hanja sebagai ada apa-apa jang meminta soepaia ia berati-ati.

曰其言也訥斯謂之仁矣乎。子曰。

爲之難。言之得無訥乎。

Wat ki gan ja djiem soe wie tji djin ie houw. Tjoc wat.
Wi tji lan. Gan tji tek boe djiem houw.

Artin ja:

Soe Ma Gioe merasa tida maoe mengarti sama katrangan dari goeroenja jang sanget saderhana, maka ia laloe menanja lebi djaoe sambil katanja:

Sabegitoe djaoe jang akoe taoe, prihal kasoetjian ada sanget loewas sekali, maka apakah dengen goeroekoe poenja katrangan bahoca; saorang jang soetji tida sembarangan oetjapken perkata'nnja, itoe soeda tjokoep diseboet Djin?

Nabi kita mendjawab :

Dari sitoe kau haroes tjari taoe lebi djaoe, apakah sebabna maka saorang soetji tida sembarangan kelocarken perkata'an. Orang, aken berlakoe dengen bisa menjotjoki pada pembitjara'nnja ada socatoe hal jang soeker, maka manatah boleh ia tida maoe mendjaga dengen ati-ati, soepaia djangan sampe kena mengoetjapken perkata'an sembarang-barang ?

Maka Nabi kita kasi penjaoetan begini; lantaran moerid Soc Ma Gioe mempoenjain tabeat jang tida bisa djaga pembitjara'nnja.

司馬牛問君子。子曰。君子不憂不懼。

Soe ma gioe boen koen tjoe. Tjoe wat.

Koen tjoe poet joe poet kie.

A rt i n j a :

Soe Ma Gioe menanja prihal saorang jang bagimana keada'nnja jang boleh dipandang arif dan bidjaksana.

Nabi kita dapet taoe bahoea tabeutanja Soe Ma Gioe ada banjak bersedi dan tetakoetan, maka ia sengadja kasi djawaban begini:

Saorang jang arif bidjaksana perasahannja ada merdika, la tida bersesa-soesa sama perkara jang belon kedadian dan tida takoet-takoet sama perkara jang moesti dilakooeken dengen benar.

日不憂不懼斯謂之君子乎。

子曰。內省不疚。夫何憂何懼。

Wat poet joe poet kie soe wie tji koen tjoe houw.

Tjoe wat. Lwee seng poet kioe. Hoe ho joe ho kie.

A rt i n j a :

Kombali Soe Ma Gioe mersa sangsi sama ini katrangan jang saderhana dan ia djadi menanja lebi djaoe:

Apakah djikaloe saorang jang bisa berlakoe tida sedi-sedi dan tida tetakoetan soeda boleh di seboet satoe Koentjoe?

Nabi kita kasi katrangan lagi:

Kau djangan taro pemandangan begitoe singkat. Sasocatoe Koentjoe dalem sari-sari batinnja ada selidiki ia-poenja perboeatan hingga tida ada tjetjatnja, maka ia djadi dapet rasaken didalem doenia ini ia ada idoep merdika, diatas ia tida oesah maloe pada langit dan dibawah ia tida oesah maloe pada boemi. Djikaloe keada'nnja ada sademikian, ada sedi dan takoet-takoet apatah lagi boeat ianja?

通俗教育

THONG SICK KAUW JOK

Pendidikan oemoem.

人身貴

Djin Sin Kwie.

A rt i n j a :

Kamoelija'nnja toeboe manoësia.

Antara segala benda di kolong langit ini, melingken toeboenja manoësia jang paling moelia.

Toeboe kita, adalah ajah dan bonda kita jang telah lahirken dan ia terplihara oleh langit dan boemi.

Aken menegoehken kita-poenga angen-angen dan boeat perbaiki kita-poenga kabedjikan, aken menggoenaken itoe ada dari kita poenga toeboe. Jang mendjaga kaslametannja roema-tangga dan jang menjinta pada negri, poen ada kita-poenga toeboe.

Jang mendajaken hingga bisa membikin broentoeng di doenia dan jang bisa membikin hingga kita bisa meninggalken nama haroem di djeman kamoedian, djoega ada toeboe kita.

Kitab-kitab koeno poen ada meloekis: 人爲萬物之靈—
Djin wi ba an bo et tji leng = Manoesia ada machloek jang paling tjerdk diantara segala machloek didoenia, dan lagi: 天之所生 地之所養 惟人爲人—Thian tji se seng. Tee tji se jang. Wi djin wi ta ij = Apa jang diidöepken oleh langit dan di piara oleh boemi, melingken manoesia ada jang terbesar.

Ini semoga apakah boekan bermaksoed aken menjataken, bagimana moelia adanja toeboe dari manoesia?

衛 生 要 義

Wee Seng Jauw Gie.

Artin ja:

Kapentingannja djaga pri-kaschatan.

Kerna njata bahoca manoesia poenja toeboe ada begitoe moelia, maka orang haroes mengetahoei baik-baik tjara bagimana aken menjajang dan melindoengi, dan tjara bagimana aken mendjaga dan mamelihara, lantaran apa hingga njata bahoca pladjaran oentoek djaga pri-kaschatan tidualah boleh tida diperhatiken.

Wee Seng, atawa djaga pri-kaschatan, ada berarti melindungi soepaia kita-poenja djiwa djangan terlinjap dengan sia-sia. Orang, lantaran tida mengarti prihal pendjaga'an pri-kewarasannja hingga banjak jang mati boekan dengen soewadjarnja. Dengan demikian djadilah, sedeng ajah-bonda kita lahirken kita-poenja toeboe dengan djangkep, tapi kita tida bisa poelangken dengan djangkep djoega, lantaran apa maka boekan sadja kita djadi soeda melanggar pada kaharoesannja aken berbakti pada orang-toewa, hanja malah kita soeda katjiwaken kabedjikannja Tochan jang senantiasa menjajang pada oematinja.

**

疾 病

Tjit Peeng.

Artin ja:

Penjakit.

Kasedihan jang paling berat bagi orang idoep tida ada jang melebiken dari-pada sakit, dari serangan mana djikaloe enteng ia aken merasaken kesakitan, atawa apabila berat ia bakal djadi tjtatjat dan meninggal doenja.

Demikianlah maka itoe sekalian achli pri-kaschatan senantiasa berdaja aken soepaia manoesia bisa terloepoet dari godahannja penjakit, kerna djika bisa terloepoet dari sakit toeboe kita aken djadi sehat dan dari toeboe jang sehat orang aken mendapet oemoer pandjang, dengen begitoe kita djadi menjockoepin perminta'an soewal mendjaga pri-kaschatan.

Tapi, boeat orang maoe terlepas dari sakit ia koedoe mengetahoei bahoca poko asalnja panjakit ada dari mana. Disini biarlah dioendjoeken sedikit jang kasarnja sadja, jaitoe asalnja penjakit ada dari tiga djalan, jaitoe pertama: kita dahar barang makanan jang tida baik; kadoea: kita poenja gerakan badan tida tjoekoep dan katiga: kita poenja pikiran tida bisa antang.

**

飲 食

Im Sit.

Artin ja:

Makan-minoem.

Makan dan minoem ada goena mamelihara kita - poenja toeboe, tapi djika itoe semoea kita tida djaga dengen betoel hingga kita kena makan atawa minoem barang jang tida baik, ia bebalik bakal mengasi bahaja pada toeboe kita.

Brapa waktoc paling blakang thabib-thabib dari sekalian negri ada menjataken, bahoca orang sakit 8 atawa 9 dari sepoeloe bagian ada lantaran dari makanan, maka disini biarlah dibitijarakken doeloe prihal djaga pri-kaschatan jang berhoeboeng sahia makanan.

Barang santapan antaranja bisa dibagi djadi doea bagian. Pertama: makanan jang membahajaken toeboe, jaitoe barang santapan jang didalemnja ada mengandoeng ratjoen dan bisa meroesak toeboe kita, sedeng sebaliknya matjem jang kadoea

adalah makanan jang beroena bagi toeboe manoesia, jaitoe barang santapan jang tida mengandoeng ratjoen dan malah bisa mamelihara kita-poenja badan.

**

酒

Tjioc.

Artin ja:

Arak.

Arak, kendati membawanya bahaja tida lebi heibat dari-pada opium, tapi ia djoega tida koerang berbahajanja dalem hal meroesak toeboe dan membikin loedes pada pri-kabedjikan.

Sasoeda orang iroe arak tjahaja moekanja lantas djadi mera, dimana kita-poenja dara telah kena diganggoe. Selainnya begitoe, pikiran poen lantas djadi limboeng, dari mana ternjata bahoca kita-poenja otak ia telah pengaroein.

Orang jang telah kekawakan sontak arak dalem peroetnja djadi penoe sama segala ratjoen panas, jang mana aken membahajaken ia-poenja pikiran dan kewarasan badannya.

**

外國酒

Gwee Kok Tjioc.

Artin ja:

Arak dari negri asing.

Arak dari dalem negri sendiri (Tiongkok) ada mengasi bahaja besar, tapi arak jang didatengken dari negri asing, atawa alcohol, berbahajanja ada lebi heibat lagi. Minoeman keras dari lain negri harganja ada tinggi dan tenaganja keras. Saben kali minoem, kita tida bisa dengan tida mengorbanken doeit setenga atawa satoe dollar.

Apabila kita-poenja otak soeda dipermainken oleh pengaroeinna itoe alcohol kita nanti boleh loepa daratan, loepa kita-poenja kadoedoekan sebagi ajah, poetra atawa soedara, dan tida inget lagi sama prilakoe-prilakoe jang badjik. Demikianlah, hingga didalem negri Europa sendiri orang lagi asjik bikin pergerakan boeat menjega orang iroe alcohol.

Maka, djikaloc orang Europa sendiri berdaja aken membuat itoe penjegahan, bagimanatali djoega kita orang Tionghoa djadi bebalik gemarin sama itoe matjem minoeman? Bockankah dengen begitoe ada sama sadja dengan kita oendang setan masoek dalem roema kita dan zonder maoe perdoeli sama bahajanja?

**

貪食之害

Tham Sit Tji Haü.

Artin ja:

Berbahajanja rakoes sama makanan.

Di atasan ada mencrangken keada'anna barang-barang jang bisa membahajaken toeboe manoesia, jang mana orang haroes bisa singkirken. Sebaliknya, barang-barang jing bisa mamelihara toeboe poen orang koedoe taoe memakenja soepatai djadi tjoetjok dan berhasil.

Itoe barang makanan, maka manoesia tida boleh zonder ada dia, kerna makanan adallah bisa menamba hawa dan dara bagi manoesia. Orang jang tida makan bebrapa hari daranja tentoe aken djadi koerang dan tenaganja lemas, achir-achir teroes mendjadi mati.

Maka manoesia tida bisa tida makan, tapi sebaliknya djoega ia tida moesti makan terlaloe banjak. Ada banjak itoe orang-orang ping seraka sama makan, lantaran ia makan terlampau banjak, hingga itoe makanan tida bisa djadi antjoer dan achirnya timboel djadi penjakit.

Orang-orang jang berdaja aken dirinja djangan dapat sakit, antara lain-lain ia haroes perhatiken djoega sama menjega djangan makan terlaloe banjak, teroetama dahar barang makanan jang tida gampang bisa djadi antjoer.

**

運動 (一)

Oen Tong (1).

Artinj a:

Sport.

Bagian atas ini telah mengoerci tentang adanya makanan jang tida baik, bisa bikin orang djadi banjak jang dapat sakit dan banjak orang mati. Sekarang diroending bahoea gerakan badan jang tida tjoijok poen bisa djadi bilitnja penjakit.

Pendjaga'an badan boleh dibagi djadi tiga fatsal, jaitoe sport, tidoer tjoekoep dan bikin bresi badan.

Disini baik dioereiken doeloe prihal sport.

Bagimana besar kagoena'nnja permainan sport kita-poenja bangsa kebanjakan tida dapat mengetahoei.

Prempoean - prempoean dan itoe sastrawan - sastrawan di Tiongkok kebanjakan lebi socka ngedam didalem roema, dimana marika bikin pakerdja'an tangan, membatja atawa menoelis. Dengan begitoe, bisa bikin mengalirnya dara djadi koerang lantjar, tjahaianja poetjet sebagai orang jang sedeng sakit.

Dengan ini sadja soeda mengendoek boekli, bahoea dengan tida bikin gerakan badan jang tjoekoep ada satoe bahaja.

**

運動 (二)

Oen Tong (2).

Artinj a:

Sport.

Orang menanja, mengapatah dengan tida bikin gerakan badan jang tjoekoep bisa mengasi bahaja begitoe heibat?

Djawaban:

Itoelah dari sebab koerangnya kena sinarnja matahari dan koerang dapat hawa oedara. Orang kaloe terlaloe banjak tinggal dalem roema, ia djadi saben-saben tjoema dapat mengisep hawa napasnja sendiri jang soeda kotor, lantaran apa djika tenaganja tida djadi lema tentoe ia lantas dapat sakit. Sebaliknya, apabila ia sering bekerdja atawa bikin gerakan badan di tempat terbocka, dimana ia nanti dapat isep hawa oedara jang seger dan banjak dapat sinarnja matahari jang bisa bikin linjap kakotoran, nanti dara jang boesoek dan barang-barang jang kotor tida tinggal melengket pada toeboenza. Dengan begitoe, ia aken djarang dapat sakit dan badannya segar boegar.

Liat itoe orang-orang tani di desa. Marika poenja makan dan minoem maski tida begitoe banjak dan tida begitoe baik sebagai makanan dan minoemannja pendoedock didalem kota, tapi sebaliknya kakosenannja dan pandjangnya oesianja ada melebih dari orang-orang jang berdiam di kota.

Apa itoe boekan ada hasil dari kesaadahannja gerakan badan?

**

安睡

An Swie.

Artinj a:

Tjoekoep tidoer.

Manoesia idoep memang moesti bekerdja, tapi tjara bekerdja jang terlaloe paksa diri bisa membahajaken pada otak. Orang niemang koedoe bergerak, tapi djika bergerak dengan meliwati wates poen bisa meroesak pada tenaga. Demikianlah, maka bahoea: apabila sampe temponja orang koedoe berdaja aken soepaia ia bisa dapat tidoer jang tjoekoep, ada mendjadi satoe antara fatsal-fatsalnya jang penting dari soewal orang mendjaga pri-kasehatan dirinja.

Ada banjak djoega orang-orang jang bertemaha sama kaoentoengan, ia pandang bahoea doeit ada mendjadi benda jang paling teroetama di doenia. Lantaran begitoe, sampe lepas tengamalem djoega ia masih lakoeken pakerdja'nnja, hingga ia-poena toeboe dan pikiran djadi roesak. Selainnya itoe, ada djoega itoe orang-orang moeda jang soeka memboeroe koepoe-koepoe malem, jang mana djika ia sedengnya didalem plesiran dan mabok, dari siang sampe djadi petang, dan dari petang sampe kembali djadi siang ia tida dapet tidoer, lantaran apa boekan sadja ia soeda sia-siaken tempo jang berharga, malah ia-poén sampe telantarkan pakerdja'nnja, dan terlebi djaoe djoega ia djadi membahajaken pada toeboenja sendiri serta meroesak kabedjikannja.

Orang-orang moeda, haroes soeka berlakoe lebi ati-ati dalem membawa dirinja.

洗 身

Sian Sin.

A tin ja:

Bikin bresi badan.

Segala barang makanan, sasoedanja didabar plahan-plahan djadi antjoer dan mendjadi dara. Tapi djoega ada makanan **jang** tida bisa djadi dara seanteronja dan makanan jang begitoe aken djadi kakotoran. Kakotoran, selainnya beroepa nadis dan aer kentjing, djoega biasa kaloear menemboes dari lobang-lobangnya koelit. Begitoelah maka itoe tanda-tanda item atawa daki jang terdapat pada toeboe manoesia, ada diterbitken oleh itoe kakotoran didalem badan. Djikaloe itoe tida dijoeftji, toeboenja aken **djadi** item dan itoe lobang-lobang koelit tertooetop, lantaran apa maka itoe kakotoran tida bisa menemboes kaloear hingga membahajaken pada kita-poena dara.

Jang banjak **terdapat** kaserang oleh penjakit adalah itoe orang-orang desa. Ini semoea poen tjoe ma lantaran marika koerang bikin bresi badan atawa mandi. Dengan saben kali mandi toeroet waktoenja dan toekar pakean sebagimana moestinja, orang aken dapat koerangan dari serangan jga penjakit.

(Aken disamboeng).

上 孟 SIAANG BEENG

Kitab Siaang Beeng.

孟子見梁惠王。王曰。叟不遠千里而來。亦將有以利吾國乎。

Beeng tjoé kiaan liang hwie ong. Ong wat. Soh poet wan tjhian li dji laij. Ek tjiang joe i lie goh kok houw.

Artin ja:

Rasoel Beengtjoé memang soeda lama mengandoeng pikiran hendak berdaja, aken memperbaiki keada'an doenia jang itoe masa sedeng kaloet, tapi sabegitoe djaoe jang ia dapet rasa tida ada radja-radja moeda jang bisa menerima ia-poena nasehat-nasehat. Kabetoelan djoega lantas ada radja Liang Hwie Ong jang menjataken bahoea ia soeka menerima kedatengannja orang-orang pande, hingga dari kota Tjoh Ip ia laloe brangkat mengoendjoengi negri Liang boeat ketemoein radja terseboet.

Koetika bertemoe satoe sama lain radja Liang Hwie Ong sigra berkata: Soh (satoe seboetan aken mendjoendjoeng saorang toewa) begitoe tida kenal tjape, hingga dari djaoenja 1000 paal perloeken dateng kemari, apakah dengan demikian brangkali bakal mendatengken kabroentoengan oentoek negrikoe?

孟子對曰。王何必日利。亦有仁義而已矣。

Beeng tjoé twie wat. Ong ho pit wat lie. Ek joe djin gie dji i ie.

Artin ja:

Beengtjoé mendjawab sambil katanja: Dalem membijarakken daja tentang oeroesan negri, mengapatah djoega baginda tjoe ma oe mengoetamaken prihal kabroentoengan sadja? Jang terpenting sekarang adalah koedoe dibilitarakken prihal atoeran pamirrentahan jang berdasar pri-kemanoesia'an serta keadilan.

王曰何以利吾國。大夫曰何以利吾家。士庶人曰何以利吾身。上下交征利。而國危矣。
 萬乘之國。弑其君者必千乘之家。
 千乘之國。弑其君者必百乘之家。
 萬取千焉。千取百焉。不爲不多矣。
 苟爲後義而先利。不奪不饑。

Ong wat ho i lie goh kok. Ta ij ho e wat ho i lie goh keh. Soe sie djin wat ho i lie goh sin. Siaang heh kaoh tjeng lie. Djie kok goei ie. Baan seeng tji kok. Sie ki koen tja pit tjhian seeng tji keh. Tjhian seeng tji kok. Sie ki koen tja pit pek seeng tji keh. Baan tji tjhian jan. Tjhian tji pek jan. Poet wi poet to ie.
 Koh wi houw gie dji sian lie. Poet toat poet jaam.

A r t i n j a :

Rasoe B e e n g t j o e teroesken perkata' annja:

Maka akoe bilang soepaia baginda djangan meloeloch maoe bitjaraken prihal kabroentoengan, adalah sebabnya begini: Baginda ada sebagai kepala dari socatoe negri, maka djikaloe baginda semata-mata memboeroe kabroentoengan dan menanja apa jang boleh mengasi kabroentoengan pada baginda poenja negri, lantas itoe angin mentjari kabroentoengan bakal menioep sampe lain-lain orang poen nanti meniroe, jaitoe itoe ambtenaar-ambtenaar djadi aken menanja djoega apakah jang bisa mengasi kabroentoengan bagi ia-poenja roema-tangga, lebi djaoe, kapan pembesar-pembesar soeda djadi demikian roepa, rajat negri poen nanti aken mengiri dan dengen loepa daratan ia selaloe maoe pikirken peroentoengan oentoek dirinja.

Begitoelah, k-rna antara pembesar dan pembawah pada riboetin prihal kabroentoengan dan jang satoc tida maoe kala pada jang lain, tida oeroengan dalem negri bakal timboel kekaloctan dan achirnja djadi berbahaja. Gouverneur-gouverneur

nanti berdaja aken merampas negri dan memboenoer radja, sedeng ambtenaar-ambtenaar jang sebawahan poen nanti berdaja aken merampas daera dan boenoer pada ambtenaar jang sebla atasan. Samentara toeroet platoeran jang soeda ditetepken sasoeatoe mantri besar boleh dapet mamegang daera sepocloe precent besarnya dari loewasnja radja poenja daera dan sasoeatoe 大夫—Ta ij H o e boleh dapet mamegang daera sepocloe precent besarnya dari loewasnja 諸侯—T j o e H o h poenja, jaitoe oepama radja ada mamegang daera dari salaksa 乘—Se eng mantri dapet pegang seriboe Se eng dan sasoeatoe T j o e H o h djika ada mamegang daera seriboe Se eng pada ia-poenja Ta ij H o e dikasi pegang seratoes. Ini platoeran ada pantes serta adil dan masing-masing boleh merasa senang dan tjoekoep. Tapi, kaloe satoe kali prihal kepantesan dan keadilan diblakangin, sebaliknya orang maoe mengoetamaken sadja prihal kabroentoengan, nistjaia itoe ambtenaar-ambtenaar nanti timboel hati katemaha' annja, jang mana sabigitoe djaoe marika belon bisa boenoer pada radjanja dan rampok semoea ia-poenja kudoedockan dan milik, marika belon maoe merasa poewas.

未有仁而遺其親者也。未有義而後其君者也。

Bie joc djin dji wie ki tjin tja ja. Bie joc gie dji houw ki koen tja ja.

A r t i n j a :

B e e n g t j o e teroesken bitjaranja:

Prihal pamerentahan berdasar pri-kemanoesia'an dan keadilan selainja ada itoe perkara jang djedjak dan moesti dilakooeken oleh sekalian manoesia, didalemnja poen memang ada mengan-doeng kabroentoengan jang sedjati. Sasoeatoe orang jang kenal pri-kemanoesia'an batinnja tentoe mengandoeng pengrasahan tjintakaseh jang dari Toehan, maka belon perna ada bahoea saorang jang soetji sia-siaken orang-toewanja. Sedeng sasoeatoe orang jang

mengoetamaken pri-kabenaran ia-poenja pikiran tentoe perhatiken apa jang sabenarnja marika moesti indahken, maka belon perna ada bahoea saorang jang mamegang kabbenaran ia membla-kangken pada radjanja.

王亦曰仁義而已矣。何必曰利。

Ong ek wat djin gie dji i ie. Ho pit wat lie.

A r t i n j a :

Demikianlah, begitoe Rasoel Beengtjo e toctoep pembitjara'nnja, dalem hal mengatoer negri baginda perloe bitjaraken perkara atoeran pri-kemanoesia'an dan keadilan, kenapatah djoega moesti maoe bintjangken prihal kabroentoengannja sadja.

孟子見梁惠王。王立於沼上。 顧鴻鴈麋鹿。曰賢者亦樂此乎。

Beeng tjoek kiaan liang hwie ong. Ong lip i tjaoh siaang. Kouw hong gaan bi lok. Wat hian tja ek lok tjhoe houw.

A r t i n j a :

Soeatoe hari Beengtjo e pergi ketemoein poela pada radja Liang Hwie Ong. Ihi baginda djoe stroe diketemoeiken lagi berdiri di dekat empang sambil mengawasin boeroeng-boeroeng Hong Gaan dan mendjangan-mendjangan. Koetika meliat kedadengannja itoe Rasoei Liang Hwie Ong sigra menanja katanja:

Akoe denger radja-radja jang bidjaksana saben hari iboekin prihal memperbaiki dirinja dan radjin merekokin pakerdja'an negri, maka apatah djoega ia ada mempoenja kasenangan sama memandang empang, boeroeng-boeroeng dan binatang-binatang begini?

孟子對曰。賢者而後樂此。
不賢者雖有此不樂也。

Beeng tjoek twie wat. Hian tja dji houw lok tjhoe.
Poet hian tja soci joe tjhoe poet lok ja.

A r t i n j a :

B e e n g t j o e mendjawab katanja:

Djoestroe radja-radja jang bidjaksana, baginda, jang bisa merasakan kasenangannja keada'an begini, tapi bagi radja-radja jang tida mempoenja keadilan dan pri-boedi, kendati ia ada poenja tempat-tempat begini toch ia nanti tida bisa merasakan kasenangannja.

詩云。經始靈臺。經之營之。庶民攻之。
不日成之。經始勿亟。庶民子來。王在
靈圃。麀鹿攸伏。麀鹿濯濯。白鳥鶴鶴。
王在靈沼。於物魚躍。文王以民力爲
臺爲沼。而民歡樂之。爲其臺曰靈臺。
謂其沼曰靈沼。樂其有麋鹿魚鼈。
古之人與民偕樂。故能樂也。

Si in. Keng si leng taij. Keng tji eng tji. Sie bin kong tji.
Poet djieng seng tji. Keng si boet kek. Sie bin tjaoh laij. Ong tjaoh
leng tjaoh. Joe lok joe hok. Joe lok tjok tjok. Pek niaoh hok hok.
Ong tjaoh leng tjaoh. Oh djiem gi jak. Boen ong i bin lek wi
taij wi tjaoh. Djip bin hoan lok tji. Wi ki taij wat leng taij.
Wie ki tjaoh wat leng tjaoh. Lok ki joe bi lok gi piat.

Koh tji djin i bin taij lok. Kouw leng lok ja.

A r t i n j a :

Boeat mengasi kategasan atas ia-poenja perkata'an bahoea melingken radja-radja jang pande dan bidjak baroe bisa merasakan kasenangan begitoe roepa. Rasoei Beengtjo e telah mengoe-lang boeninja kitab sair jang ada mengoerei sebagai berkoet:

文王—Boen Ong ada socatoe radja jang bidjaksana dari docloekala. Tatkala ia berniat hendak mendiriken panggoengan Leng Taij, baroe sadja ia mengoekoer loewasnja dan mengatoer perna-pernanja, sakoenjoeng-koenjoeng rajat negri soeda pada rame-rame dateng aken bantoe kerdjaken itoe oeroesan, hingga dalem tempo jang begitoe tjepe sekali itoe' pendirian soeda djadi rampoeng. Itoc waktoe radja terseboet sabenarnja meraña koeatir nanti banjak membikin soesa pada rajatnja, maka ia keloearken titah aken kerdjaken sadja itoe pendirian dengan tida oesah keboeroe-boeroe. Tapi sebaliknya rajat sendiri keliatan ada begitoe goembira seperti marika lagi bantoe pakerdja'an orang-toewanja sendiri, dengan zonder dioendang marika pada dateng membantoe, hingga slesenja itoe pakerdja'an tjoema makan tempo dalem sedikit hari sadja.

Satelah itoe panggoengan rampoeng dikerdjaken, di sebla bawahnja ada disertaken kebonan. Djikaloe itoe radja lagi iseng-iseng dalem itoe kebon ia bisa meliat binatang-binatang mendjangan besar dan ketjil jang ada diplihara disitoe, binatang mana lakoenna ada djinak sekali dan gemoek, beserta boeroeng-boeroeng jang boeloenja keliatan poeti dan bresi. Didalem itoe kebon ada dibikinin satoe empang, dimana ada diplihara ikan-ikan. Kapan radja Boen Ong berada di tepi itoe empang ia bisa liat itoe ikan-ikan jang penoe didalemna, pada benang atau melompat-lompat begitoe senang.

Itoe kitab sair menoclis aken menjataken bahoe; radja Boen Ong diriken panggoengan jang begitoe tinggi dan gali empang jang begitoe dalem semoea telah menggoenaken tenaganja rajat, jang mana patoetna rajat negri bisa merasa mendongkol. Tapi keada'an tida begitoe, hanja malah marika rame-rame dateng membantoe sendiri dan selainna marika tida poesing pada ketjapecannja bebalik marika merasa goembira,

begitoe goembira sampe seboet itoe panggoengan marika kasi nama Leng Taij dan itoe empang dikasi nama Leng Tjiaoh (panggoeng dan empang jang gaib), kerna saking rampoengnya itoe pakerdja'an jang begitoe tjepe hingga sebagai telah dapat bantocan dari kaki-tangannja orang aloes. Lebi djaoe, rajat negri poen toeroet merasa senang dengan adanja itoe binatang mendjangan dan boeroeng-boeroeng jang terdapat dalem itoe kebonan dan itoe ikan-ikan jang penoe dalem empangan saolah-olah itoe semoea marika anggep memang tjoema maika-poena radja itoe sadja jang patoet mempoenjai.

Sebabnja hingga bisa menjadi begitoe adalah kerna: radja-radja jang bidjaksana dari docloekala senantiasa menaro tjinta pada rajatnja, maka platiocran-platoeran jang ia lakoeken poen ada begitoe adil, hak-haknya rajat selaloe didjaga djangan sampe terganggoe, pengidoepannja rajat didjaga soepaia djangan sampe djadi kakoerangan, rajat diandjoerin biar madjoe dalem hal merekokin pakerdja'an pertanian dan pamelihara'an leiwian goena idoepnja dan pladiaran-pladjaran kabedjikan poen dimadjoeken soepaia rajat negri dapet didijk hingga sopan. Demikianlah, rajat negri djadi bisa idoep beroentoeng dan sebaliknya marika poen bergirang kaloe radjanja bisa dapet rasa kabroentoengan, jang mana djadi radja dengan rajat bersama-sama senang.

Itelah padoeka, begitoe Beengtjo'e toetoep pembijara'annya, apa jang akoe tadi bilang: tjoema itoe radja-radja jang bidjaksana baroe bisa rasaken kabroentoengan dan kasenangan itoe semoea.

藍 田 呂 氏 鄉 約
LAM TIAN LOE SI HIANG IJAK.

Rentjana perdjandjian pendoedoek sakampoeng dari familie LOE di LAM TIAN.

Didalem district 藍田—Lam Tian residentie 西安府—Se An Hoe ada idoep familie Lo—Loe. Ini familie terkenal kelakoeannja ada baik dan pribodenja soetji.

呂氏—Loe Sie, atawa itoe familie Lo e, ada terdiri dari berampat soedara lelaki, jaitoe pertama bernama 大忠—Taij Tiong alias 進伯—Tji en Pek, kadoea 大防—Taij Hong alias 微仲—Bi Tiong, katiga 大鈞—Taij Kin alias 和叔—Ho Siok dan keampat, jang paling boengsoc, bernama 大臨—Taij Lim alias 與叔—I Siok.

Ini berampat soedara, selainnya ada idoep roekoen marika poen ada dihormatin oleh pendoedoek dari sakampoengnya berhoeboeng sama marika poenja kepandean serta soeka mengasi nasehat-nasehat jang baik bagi sesama pendoedoeknya, hingga achirnya marika telah bisa mengadaken platoeran aken pendoedoek dari sakampoeng itoe bikin perdjandjian, boeat bersama madjoeken pri-kebaikan dan singkirken perhoeatan-perbocatan jang djelek.

Demikianlah, kerna merasa bahoea itoe tjara-tjara ada faedahnja oentoek pergaoelan dan kebaikannja Siahwee, maka poedjonggo 朱熹—Tjoe Hi, alias goeroe 朱夫子—Tjoe Hoe Tjoe, telah koetib bebrapa fatsal dari itoe perdjandjian dan dimoeat dalem ia-poenja pembikinan boekoe 小學集解—Siaoh Hak Tjip Kaij bagian 善行錄—Siaan Heeng Liok—“Tjatetan dari prilakoe jang baik”.

Antara itoe platoeran-platoeran ada didjandji, bahoea orang-orang jang tocroet dalem itoe perseriketan teroetama koedoe lakoeken atoeran sebagi di bawah:

1). 德業相勸—Tek Giap Siang Khwaan—Kaloe ada kawan jang badjik tekoe-boedinja dan radjin dalem meangoeroes kewadjibannja, satoe pada lain haroes bisa saling mengandjoerin biar jang lain-lain soeka ambil boeat toeladan;

2). 過失相規—Koo Sit Siang Koei—Djika ada kawan jang berboeat kesalahan atawa pri-lakoenna tersesat, jang lain-lain haroes rame-rame oendjoeken itoe kesalahan dan kasi nasehat padanja;

3). 禮俗相交—Le Siok Siang Kaoh—Dalem pergaoelan koedoe dioetamaken prihal adat kabiasahan jang sopan, dan

4). 惠難相恤—Hwaan Laan Siang Soet—Apabila antara kawan-kawannya ada jang mendapat soesa dan katjilaka'an, jang lain rame-rame haroes membri pertoeloengan.

Lebi djaoe, kapan ada kawan-kawan jang berboeat kebaikan koedoe ditjatet dalem satoe register, sedeng lid-lid jang berdosa atawa melanggar perdjandjian poen haroes didaftarin. Sasoeatoe anggota jang bikin pelanggaran sampe tiga kali ia haroes dikenaken boete dan djika ia tetep tida soeka meroba pri-kasesatannya moesti disingkirken dari pergaoelan.

K a t r a n g a n:

Boeat mengoeroes ini kaperloean, dengen permoeifikatannja kebanjakan orang, koedoe diangkat saorang jang ada oemoer dan berkelakoean badjik aken menjadi pengoeroes kepala dan doea orang lain jang mempoenjai kepandean serta prilakoe baik aken djadi pembantoe. Ini angkatan dibikin giliran saben-saben boelannja.

Sama sekali diplihara tiga register, dimana pertama ditjatet adanja leden, kadoea ditjatet adanja orang-orang jang berboeat

kebaikan dan katiga boeat menjatet adanja lid-lid jang berboeat kesalahan. Dalem itoe saboelan koedoe ditjatet adanja itoe semoea dan pada achir boelan laloe dirapportken pada pengeroes kepala, aken lebi djaoe diserahken pada pengantinna.

Jang diartiken 德業相勸—Tek Giap Siang Khwaan adalah:

Apabila mendapat liat kebaikan ia moesti lakoeken dan kapan taoe dirinja berboeat kakliroean ia moesti roba. Ia bisa mendjaga dirinja dengen baik, bisa mengeroes roema-tangganja hingga sampoerna, bisa merawat orang-toewa, bisa mendidik anak dan soedara-soedara. Bisa mengatoer boedjang-boedjang, bisa menghormat orang-orang besar dan orang-orang jang lebi toewahan. Bisa ragem sama familie dan sobat-sobat, bisa memili orang-orang jang aken didjadiken kenalan. Bisa mamegang kasoetjan, bisa berlakoe penjajang dan dermawan, bisa dipertijaya atas orang poenia penjerahan padanja. Bisa menoeloeng kawan kawannja jang bersoesa dan dapat bahaja, bisa mengandjoerin orang aken berlakoe baik. Bisa menasihatken orang poenia kesalahan, bisa bantoe oerocessanua lain orang, bisa memberesken pakerdja'an oemoem. Bisa memisaken perselisihan-perselisihan, bisa memoetosken antara kesalahan dan kabeneran, bisa madjocken apa jang djadi kabroentoengan dan bisa singkirken bahaja-katjilaka'an dan bisa mendjabat pangkat serta angkat ambtenaar-ambtenaar sebahawannja dengen betoel.

Ini semoea termasock dalem bilangan 電—Tek atawa kabedijken. Sedeng jang diartiken kewadjiban adalah:

Didalem roema-tangga: merawat orang-toewa, mendidik anak dan soedara-soedara serta memimpin istrinja. Di peloearan: menghormat orang-orang jang lebi toewahan, bergaoel sama sobat-ande, memimpin pada orang-orang jang lebi moedahan, mamerenta boedjang-boedjang, sampe pada soewal pladjaran,

mengatoer pakerdja'an oentoek perbaiki economienja kita-poena roema-tangga, dimana termasoek djoega prihal adjar adat-istiadat, sport, membatja, ilmoe mengitoeng dan lain sebaginja.

**

Jang diartiken: 過失相規—Koo Sit Siang Koei ada begini:

Kascasan jang melanggar pada pri-kepatoetan terbagi djadi 6 fatsal: pertama: pemabokan, pendjoedi, penjari setori dan pendengki jang soeka meroegiken pada lain sihak aken mengoentoengken pada sihaknya sendiri; kadoea: perboeatan-perboeatan jang melanggar kepantesan dan melanggar platoeraan; katiga: kelakoean jang tida sopan, seperti tida endahin orang-toewa dan orang-orang jang baik, soeka menjindir pada lain orang, mengandelin kakoscennja, kendati taoe telah berboeat kesalahan tapi tida soeka meroba dan apabila dikasi nasehat jang baik boekan ia menoeroet hanja malah bebalik kasi liat kepala batoenja; keampat: omongannja tida toeoes dan tida kena dipertijaya, seperti djika lagi berempoek sasocatoe oeroesan ia soeka djeroemoesken kawannja kadalem bahaja, soeka poengkir djandji sendiri dan biasa mengobrol pandjang pendek hingga membikin tersesatna pendengeran dari orang banjak; kalima: soeka mempitena, seperti mendjelekin orang lain dengen bikin-bikin apa jang sabenarnja tida ada djadi ada, apa jang ketjil djadi besar, dan djika omong didepan depan, baik, tapi sabegitoe lekas moendoer lantas djadi lain roepa, soeka karang sindir-sindiran dan toelis soerat-soerat kaleng aken siarken orang poenia tesia dan gemar korek orang poenia perkara, dan keanem: temaha dan tjoerang, seperti bikin perhoeboengan dagang, ia meroesaken keakoeran lantaran maoe reboet kaoentoengan dengan memboeta, atawa zonder ada perloenza ia mendermis minta ini dan itoe, atawa bikin pindjeman, dan di serahin soeatoe kapertjaia'an ia berlakoe tjoerang.

Selainna itoe, ada poela lima fatsal kasesatan jang termasoek bilangan bahoea orang tida bisa mendjaga dirinja, jaitoe:

1). Bergaoel dengen sembarang orang dan tida pili boeloe, hingga sekalian boeaja, pemalesan dan orang-orang jang tida bagoes prilakoenja, jang mana orang lain tida soeka endahken padanja adalah kita djadiken seperti sobat;

2). Pelantjongan dan pemales, jaitoe soeka kelajapan tida dengen zonder taoe wajahan dan saben ketemoe orang poen tida lain ia perloe aken adjak pergi plesiran, main balap koeda, main bola, berdjoedi dan lain sebaginya, sedeng pakerdja'annya ia tida maoe open, roema-tangganja tida bisa atoer beres hingga kalang-kaboet dan kotor;

3). Tingka-lakoenja tida sopan, seperti gerak-gerakannja biadab dan kasar, apa jang ia haroes bitjaraken ia tida omongken, sebaliknya apa jang ia haroes omongken ia tida maoe bitjarain, begitoe poen itoe orang-orang jang bisa memake socatoc model pakean jang kliwat mentereng dan boekan pantesnya ia pake itoe, atawa jang memake pakean tida beratoeran sebagi-mana moestinja, atawa itoe orang-orang jang bisa gelandangan di djalanen dengen zonder memake pakean jang pantes;

4). Mengerdjaken oeroesan dengen zonder perhatian, jaitoe main peloepa'an, main menoenggoe lain tempo atawa alpaken sasoeatoe oeroesan jang ia moesti kerdjaken;

5). Menggoenaken harta zonder wates, jaitoe dengen zonder menilik ada mempoenjai atawa tidanja hanja ia main teroes sam' karojalan, atawa lantarhan sendiri didalem keada'an miskin lantas paksa diri aken menboeroe kauentoengan jang tida halal.

* *

Jang diartiken: 俗相交—Le Siok Siang Kaoh
ada begini:

Itoe semoea ada berhoeboeng sama hal-hal pernikahan, kematian, semabajangan, dalem soerat-menjoerat aken menanja ini itoe, membri slamet, menjataken docka dan lain-lain.

**

Jang diartiken: 患難相恤—Hwaan Laan Siang Soe t begini:

Pertama, bagi orang jang dapet katjilaka'an kalelep di aer atawa terbakaran: apabila itoe kedjadian-kedjadian ada ketjil sadja kita boleh soeroe orang lain, tapi djika ia ada itoe ketjilaka'an besar kita wadjib pergi sendiri aken menjataken, atawa adjak kawan-kawan bocat rame-rame menoeloeng atawa menilik adanja itoe katjilaka'an dan kematian; kedoea, dalem hal katjoerian: djika terdjadinja di tempat deket patoet rame-rame toeloeng bantoe tangkep pendjabatinja, kita boleh bantoe melaporken pada politie, atawa djika jang ketjoerian ada terdiri dari satoe familie miskin kita patoet rame-rame menoeloeng dengen oewang; ketiga, prihal kasakitan: apabila sakit jang tida berat kita boleh prenta orang aken menilik dan djika sakitnya itoe orang ada berat koedoe bantoe tjariken thabib dan beliken obat, atawa kaloe si sakit ada saorang miskin djoega haroes dibantoe kasi ongkos berobat; keempat, prihal kematian: kaloe disitoe kakoerangan tenaga haroes membantoe kaki-tangan dan kaloe jang kematian ada saorang familie miskin haroes rame-rame bantoe menjoebang ongkos atawa kasi pindjem docit padanja; kelima, anak-anak piatoe jang tida mempoenjai senderan: apabila bisa orang koedoe toeloeng aken kasi tempat dan ongkos-ongkos goena idoepnja, atawa serahken padanja pada orang jang berwadjib, atawa serahken pada lain orang jang bisa memimpin padanja dan achirnja, djika soeda sampe temponja, ia haroes di-nikahken, sebaliknya djikaloe itoe anak terdiri dari familie miskin, koedoe rame-rame dibantoe soepaia djangan sampe tida karoean tempatnya, apabila ia diganggoe orang lain rame-rame koedoe bantoe atoer bocat bikin beres dan djika ia soeda djadi besar keliatan kelakoeannja koerang betoel, rame-rame koedoe tilik dan djaga

aken djangan sampe ia melandjoet teroes hingga terdjeroemoes dalem djoerang kedjahatan; keanem, apabila ada salah satoe antaranja pendoedock jang dihinaken dengen kliwat tida patoet dan ia tida bisa bikin pembelahan sendiri: jang mana, djika rasanja moesti, baik diadoeken pada ambtenaar negri, tapi sebaliknya, kapan masi bisa diberesken sendiri, rame-rame orang haroes bantoe pisaken itoe perselisihan; lebi djaoe, djika berhoeboeng sama ini lantaran hingga itoe orang di-oesir dari tempat tinggalnya, rame-rame orang koedoe menoeloeng oewang padanja; katoedjoe, prihal kamiskinan: apabila ada lid jang ternjata bahoea ia betoel idoep menoeroet kamiskinan, tapi dengan begitoe toch ternjata ia-poenja pengasilan tida tjoekoep dipake, koedoe rame-rame ditoeloeng doeit atawa dikasi pindjem oewang modal dan ia boleh bajar paelang dengen menjitil saben boelan atawa saben taon.

**

Demikianlah, adanja itoe keampat fatsal perdjandjian jang diaoter oleh familie Loe dari district Lam Tian. Tjo e Hoe Tjo e telah koetib itoe rentjana dari boekoenja itoe familie dan ditambaken dengen beberapa perobahan menoeroet ia-poenja pendapatan sendiri, aken dibikin begitoe roepa biar tjetjok dengen djeman blakangan.

Ini platoeran perdjandjian di antara pendoedoek sakampoeng ada baik kaloe dilakoecken, terlebi poela djika soeda disatoedjoein oleh Sia w e e, hingga orang-orang dari dalem sakampoeng itoe tentoe nanti tida ada jang tida dapat rasaken hasilnya.

Orang-orang arif jang belon sampe aken bisa lakoeken maksoednja jang baik oentoek doenia dan kamoedian terpaksa moesti berdiam sadja di roema, ada baik djoega kaloe ia maoe lakoeken ini platoeran hingga berhasil dalem wijnja.

道 德 語 錄

T O O T E K G I L I O K

Roepa-roepa prihal kabedjikan.

Bagimana tjaranja soeatoe sobat jang pegang djandji betoel dan setia dalem hal membellaah pada kawannya jang dapat bahaja, pembellahan mana jang soenggoe soeker aken bisa didapet tandingannja, bisa ditilik dari perboeatan-perboeatannja 程嬰—Thia Eng dan 公孫母子—Kong Soen Tjhi Kioe, riwajat persobatan mana ada ditjeritakan sebagai berkoet:

**

Doeleokala, dalem djemannja dijnastie 趙—Tji en, ada idoep satoe ambtenaar jang djahanam bernama 趙岸賈—Toh Gaan Kee, ambtenaar mana senantiasa berdaja aken pindaken djiwanja semoce familie 趙氏—Tioo Sok ka lain doenia.

Satoe ambtenaar lain bernama 韓厥 Han Khwat dapat isep itoc baoe. Ia laloe ka si nasehat pada 趙禦—Tioo Sok aken ia ini lekas pergi singkirken dirinja soepaia slamet. Tapi Tioo Sok tida socka berboeat begitoe hanja ia bilang: „Akoe tida perloe berlakoe begitoe pengetjoet. Kau toch tida bisa liat begitoe sadja terbasminja kita-poenja kaoem Tioo? Boeat akoc sendiri, biarpoen akoe moesti mati akoc tida nanti boeat penjeselan”.

Han Khwat trima sadja ini penjaotan. Tapi koetika soeatoe hari ini ambtenaar tida kaloear kantoor lantaran sakit mendadak Toh Gaan Kee timboel hati boewasnia. Dengan diam-diam dan dengen zonder permisi dari siapa djoega bersama beberapa officier-officier ia pergi kroepoekin roemanja familie

Tioo, dimana marika telah boenoe pada Tioo Sok bersama familienna, jaitoe; 趙同, 趙括, 趙嬰—Tioo Tong, Tioo Kwat, Tioo Eng dan lain-lain.

Istrinja Tioo Sok ada satoe soesi dari hertog 成公—Seng Kong. Ini prempoean sedeng hamil dan djoestroe tjoema ia ini saorang sadja jang masih beroentoeng bisa melaiken diri dan pergi semboeni didalem astanannya itoe hertog.

Satoe kenalan dari Tioo Sok jang bernama Kong Soen Tjhi Kioe telah bertaoeken ini hal pada satoe sobat baiknya itoe orang jang tjilaka bernama Thian Eng, pada siapa achirnya ia kata: „Kenapa kau tida soeka bellah mati-matian?”

Thian Eng mendjawab: „Kenapa moesti begitoe? Bockankah kau taoe djoega bahoca istrinja almarhoeem Tioo Sok sedeng berbadan doea dan ia bisa terloos dari itoe bahaja? Kaloe ja ini nanti melahirken satoe poeta lelaki akoe berniat aken djaga dan lindoengi padanja, atawa sebaliknya djika ia lahirken satoe anak prempoean kendati disitoe akoe nanti baroe lakoeken akoe poenja pembellahan mati-matian, toch belon kasep?”

Berselang tida brapa lama kamoedian itoe djanda telah bersalin dan lahirken satoe anak lelaki. Toh Gaan Keh dapet taoe ini resia dan ia dateng ngeratak kombali di kamarnya itoe Hoedjin. Dengan boeroe-boeroe itoe djanda oempetin anaknya didalem badjoenga sambil ia mendoa katanja: „O, Thian jang moerah. Lindoenginlah pada toeroenannja familie Tioo jang tida berdosa dan orang telah kaniaja. Djikaloe toeroenan dari familie Tioo memangnya moesti toempes biarlah ini anak nanti menangis, tapi djika memang itoe familie belon takdirnya moesti dibasmi, djanganlah kau menangis, anak, kendati poen bagimana pelahan djoega”.

Beroentoeng djoega nasibna itoe anak masih moedjoer. Selama penggledahan dilakocken oleh Toh Gaan Keh, itoe anak ada begitoe antang dan sama sekali tida kadengeran meringik, lanlaran apa hingga ia telah bisa terloepoet dari bahaja maoet.

Thian Eng kamoedian laloe bermoesakatan dengan Kong Soen Tjhi Kioe katanja: „Kendati penggledahan ini kali ia tida berhasil aken bisa dapatken itoe anak, kita boleh pastiken jang ia tentoe tida maoe bikin abis sampe disitoe sadja, hanja kamoedian ia pasti bakal ngeratak poela satoe kali. Itoe sebab, maka akoe maoe menanja pada kau, bagimanatah kau pikir aken menoeloeng pada itoe anak soepaia bisa djadi slamet?”

Kong Soen Tjhi Kioe mendjawab dan bales menanja: „Tapi, akoe maoe kau tjoba bilang doeloe. Mana antaranja ada lebi soeker dilakooeken: Mendjaga itoe anak atawa kita tjari kematian?”

— Tjari kematian, akoe rasa ada lebi gampang dilakooeken, demikian Thian Eng menjaoet.

— Baik, begitoe achirnya Kong Soen Tjhi Kioe berkata. Bockankah familie Tioo ada begitoe menjinta pada kau? Dari itoe, patoetlah kau moesti ambil bagian aken lakoeken pakerdja'an jang soeker, samentara akoe nanti ambil bagian jang lebi saderhana, jaitoe biarlah akoe kerdjaken bagian jang moesti mengambil korban akoe-poenja djiwa.

Sahabisna bikin mateng ini perdjandjian, kadoea marika laloe pergi tjari satoe anak baji dari lain orang. Kong Soen Tjhi Kioe bawa itoe anak dan poera-poera pergi lari semboeni di satoe desa. Thian Eng laloe siarken omongan bahoca ia tida sanggoep aken melindoengi itoe anak dan sebaliknya sekarang siapa jang soeka kasi sogokan padanja 1000 thail mas ia nanti oendjoekin tempat disemboenikennja itoe poeta dari marhoeem Tioo Sok.

Itoe kawanan dari Toh Gaan Keh merasa girang mendenger ini warta dan marika berdjandji pada Thian Eng aken socka loeloesken ia-poena perminta'an asal marika bisa ketemoeken itoe anak ketjil. Begitoelah, dengen dipimpin oleh Thian Eng marika pergi gropiok tempat semboeninja Kong Soen Tjhi Kioe.

Kong Soen Tjhi Kioe sebaliknya poera-poera sesalin perboetanu ja Thian Eng dan kata: O, itoe sobat jang kliwat pengetjoet. Doeoean wak toe familie Tioo dikroepoekin dan diboenoe didalem roemanja ia soeda tida mampoe bellah mati-matiian dan malahan kamoedian ia soeda berempoek dengen akoe boeat oempetin ini anak jang satoe-satoenja masih ada katinggalan boeat djadi toeroenannja familie Tioo. Sekarang njata sekali jang ia soeda djocal padakoe. O, itoe manoesia djahanam, betoel ia kliwatan sekali. Kaloe ia sendiri tida mampoe kasi perlindoengan teroes pada ini anak poen soeda. Tapi, soenggoe pengetjoet adanja, kenapatah djoega sekarang ia djocal sekalian aken ini anak moesti djadi korban dan pemboenoehan?

Sahabisnja mengoetoeck pandjang pendek Kong Soen Tjhi Kioe sigra pondlong itoe anak sambil berkata: O, Thian jang moerah. Apalah sabenarnja ini anak telah berdosa hingga moestli mengalamin nasib begini roepa? Lindoengkenlah ini anak dan biarlah akoe boleh mati sendirian. Akoe poen soeka trima dengen ichlas hati!

Itoe sekalian officier-officier tentoe sekali ia tida maoe taoc sama keloeannja itoe sobat jang setia. Ia laloe tabas batang lehernja Kong Soen Tjhi Kioe bersama kepalanja itoe anak ketjil jang tida berdosa. Sasoedanja berboeat begitoe marika merasa poewas kerna soeda bisa tjaboet akarnja familie Tioo.

Samentara Thian Eng bersama itoe anak jang toelen dari marhoem Tioo Sok telah semboeni dan mendekam didalem tana-tana pegoenoengan, dimana ia tinggal dengen slamet sampe 15 taon lamanja.

Socatoe hari radja 貢景公—Tji en Keng Kong dapat sakit. Oleh achli noedjoem telah dibade bahoea penjakitnya ini radja ada lantaran pengodanja pengaroe dari socatoe familie jang perna banjak membantoe pada negri dan djasanja tida dihargaken. Itoe radja laloe menanja pada Han Khwai bagimana ia-poena pendapetan atas itoe katrangan dari achli noedjoem.

Sedeng Han Khwai ada taoe bahoea itoe poeta dari Tioo Sok sabenarnja belon mati hanja orang telah semboeniken, maka ia djawab itoe perlanja'an dari radja Tji en Keng Kong begini:

Sepandjang akoe poena taoe, itoe familie, jang dioendjoek oleh achli noedjoem sebagai socatoe familie jang banjak berdaja, dan sekarang malahan toeroenannja poen soeda djadi terpoetoes, tjoema ada familie Tioo sadja. Itoe familie doeloe-doeloe perna membantoe dengen setia pada keizer-keizer In Tee, Thajj Bouw dan keizer dari dinastie Tjioe Tiaoh. Boeat itoe semoea marika telah oendjoek djaso-djasanja jang besar dan pribodi jang bidjak. Sesampenja dinastie Tjioe djato didalem tangannya keizer-keizer 印 E—Joe Ong dan 周—Lee Ong jang terkanal tida adil dan kedjamija, baroelah 殖权帝—Tioo Siok Taij tinggalken keradja'an Tjioe Tiaoh dan dateng di negri Tji en, dimana ia bekerdjya pada marhoem 文侯—Boen Hoh sampe pada hertog 武公—Seng Kong. Toeroen-menoeroen itoe familie ada mengoendjoek djasanja dan belon perna toeroenannja djadi terbinasa. Mendak sekarang itoe toeroenan telah djadi poetes didalem tangan baginda, jai'oe orang telah basmi seantero familienja. Rajat seloerue negri

merasa ngenes meliat itoe keada'an jang tida menjenangken, lantaran apa pantes djoega djikaloe itoe keada'an dapet tertampak didalem petangannya achli noedjoem dan sekarang hingga tinggal baginda sendiri sadja jang haroes berichtiar aken perbaiki.

Radja Tji en Keng Kong merasa kaget mendenger ini warta jang ngeri dan ia tanja poela pada Han Khw at apakah benar bahoea toeroenanija itoe familie sekarang soeda tida ada katinggalan sama sekali? Han Khw at sigra kasi katrangan salengkepnja tentang djalannya oeroesan dari familie Tioo marhoem. Itoe radja laloe berempock pada Han Khw at aken toe loeng pada itoe anak dari Tioo Sok. Begitolah achirnya itoe anak diambil dari tempat disemboenikenna dan dikasi mondok di astana.

Koetika sekalian officier-officier dateng bersambang sakitnya itoe radja, Tji en Keng Kong laloe pake tenaga dari laskarnja Han Khw at boeat paksa itoe officier-officier pergi mengadep pada itoe anak jang dikasi nama 道武—Tioo Boe. Itoe sekalian officier tentoe sekali tida brani menolak dan malah achirnya marika mengakoe teroes terang dan bilang bahoea itee semoea ada atas perboeatannya Toh Ga an Keh, jang telah brani melantjaringin titahnja radja dan ia prenta sekalian kawannja aken lakoeken itoe perboeatan kedjam. Djikaloe tida begitoe, demikian kamoedian itoe sekalian officier bilang, manatah ada ambtenaar lain jang brani berboeat itoe kedjahatan hingga sampe membawa-bawa radja djadi dapet sakit. Lebi djaoe marika bilang bahoea sekalian ambtenaar-ambtenaar memang soeda berniat aken menoeloeng pada itoe toeroenan dari familie Tioo, hingga sekarang djikaloe radja telah kasi keloear ini titah nistiaja sekali marika itoe metasa amat bersjoekoer.

Disitoe Tioo Boe dan Thian Eng lantas dikenalken pada sekalian officier-officier itoe dan kamoedian bebalik

Thian Eng dan Tioo Boe sekarang dikasi hak boeat bales grepekin tempat tinggalnya Toh Ga an Keh dan boleh boenoe itoe orang djahanam bersama seantero familienna. Tioo Boe achirnya dikasi poelang ia-poenja kadoedoekan sebagimana keada'an Icloehoemja doeloe bersama ia-poenja hak-hak aken mendapat bagian tana-tana daera.

Koetika Tioo Boe soeda djadi djedjaka dan kamoedian dnikahken, Thian Eng mendadak telah madjoeken pamitan pada sekalian colleganja serta pada Tioo Boe seraja berkata:

„Doeloe, tatkala dalem roemanja familie Tioo dilanggar oleh itoe bahaja, sabenarnja kita-orang patoet soeda moesti bellah mati-matian. Akoe sendiri poen itoe wakoe boekan tida bisa djadi moesti mati djika akoe soeda membellah dengan goenaken kakerasan, tapi kerna akoe masih berpikir aken berdaja boeat menoeloeng terbasminja itoe toeroenan sama sekali, maka akoe telah tida berboeat begitoe. Sekarang Tioo Boe telah kesampenan maksodenna dan ia telah bisa dapet kombali kadoedoekanna sebagimana memang pantesnya ia dapet dan lebi djaoe ia sekarang soeda djadi dewasa, maka akoe moesti landjoetken niatkoe jang pengabisan, jaitec akoe aken mengikoeti kematianna Tioo Soan Beeng dan Kong Soen Tjhi Kioe.

Mendenger ini tjerita jang menjediken Tioo Boe laboe meleleh aer-matanja. Dengan toendoeckin kepalanja ia meminta dengan sanget soepaia ia sadja jang boleh ambil itoe bagian boeat membales boedinja Thian Eng dan kenapa sebaliknya moesti. Thian Eng djoestroe maoe tegahken hati aken tinggalken mati padanja, jang sekean lama ia sendiri telah bellah hingga bisa mendjadi slamet.

Thian Eng berkeras menjega, ia bilang: Kau haroes mengetahoei bahoea kaloc Kong Soen Tjhi Kioe telah soeka korbanken djiwanja aken ambil kematian lebi doeloe,

kerna ia pertjaia jang akoe bakal bisa bikin beres ini oeroesan, maka djika achirnya akoe tda teroesken itoe niat nistjaialah ia bisa mendoega bahoca akoe telah tida mampoe beresken itoe pakerdja'an.

Begitoelah, berselang tida lama orang banjak lantas dapet denger prihal kematianna **T h i a n Eng** jang boenoer dirinja sendiri. **T i o o B o e** tentoe sekali tida bisa berboeat lain dari pada merasa sangat berdoeka atas meninggalnya itoe orang jang meninggalin boedi padanja.

Berhoeboeng sama itoe kematian **T i o o B o e** telah berkaboenng tiga taon aken sakedar membales itoe boedi dan lebi djaoe ia diriken satoe gredja, dimana dipilihara aboenja **T h i a n Eng** dan disembajangin saben djato moesin semi (**T j h o e n**) dan ketiga (**T j h i o e**).

* * *

Penoelisnja ini riwajat telah kasi commentaar begini:

Kadjoedjoerannja persobatan antara **T h i a n Eng** dan **Kong Soen T j h i K i o e** banjak terpoedji, antara mana djoega akoe poen toeroet memoedji tida habisnya. Jang **T h i a n Eng** sasoedanja kesampean ia- poenja maksoed aken beresken itoe oeroesan besar, toch ia bolch tida oesah mati. Tapi, kaloe ia tetep telah ambil itoe kematian djoega adalah sebab ia tida soekar poengkir perdjandjiannja, kendati pada itoe masa sabenenarnja soeda tida ada jang bisa paksa padanja aken tjockoepken itoe perdjandjian.

Demikianlah keada'nnja pendekar-pendekar dari doeloekala dalem hal mamegang betoel pri-katoeloesannja, jang mana soenggoe bisa terpoedji tinggi sekali tentang kamoelia'nnja.

Tenjatak oleh:
THAIJ SIANG IN KIOK
SOERABAIA.
1924